

四庫全書

史部

欽定四庫全書

遼史卷五十

元中書右丞相總裁托克托等修

志第十九

禮志二

凶儀

喪葬儀聖宗崩興宗哭臨于敢塗殿大行之夕四鼓終
皇帝率羣臣入柩前三致奠奉柩出殿之西北門就

輜輶車藉以素裯巫者祓除之詔旦發引至祭所凡
五致奠太巫祈禳皇族外戚大臣諸京官以次致祭
乃以衣弓矢鞍勒圖畫馬駝儀衛等物皆燔之至山
陵葬畢上哀冊皇帝御幄命改火面火致奠三拜又
東向再拜天地訖乘馬率送葬者過神門之水乃下
東向再拜翼日詔旦率羣臣命婦詣山陵行初奠禮
升御容殿受遺賜又翼日再奠如初興宗崩道宗親
擇地以葬道宗崩敢塗于遊仙殿有司奉喪服天祚

皇帝問禮于總知翰林院事耶律固始服斬衰皇族
外戚使相矮微官及郎君服如之餘官承應人皆白
梟衣中以入哭臨特哩袞三父房南府宰相約尼詳
袞九奚首郎君伊勒希巴國舅詳袞十扎薩克郎君
南院大王郎君各以次薦奠進鞍馬衣襲犀玉帶等
物表列其數讀訖焚表諸國所賻器服親王諸京留
守奠祭進賻物亦如之先帝小斂前一日皇帝喪服
上香奠酒哭臨其夜北院樞密使契丹行宮都部署

入小斂翼日遣北院樞密副使林牙以所賜器服置之幽宮靈柩升車親王推之至食殯之次蓋遼國舊俗於此刑殺羊以祭皇族外戚諸京州官以次致祭至葬所靈柩降車就輦皇帝免喪服步引至長福岡是夕皇帝入陵寢投遺物于皇族外戚及諸大臣乃出命以先帝寢幄過於陵前神門之木帝不親往遣近侍冠服赴之初奠皇帝皇后率皇族外戚使相節度使夫人以上命婦皆拜祭循陵三匝而降再奠如

初辭陵而還

上謚冊儀先一日於敢塗殿西廊設御幄并臣僚幕次
大樂令展宮懸於殿庭協律郎設舉麾位至日北南
面臣僚朝服昧爽赴敢塗殿先置冊寶案於西廊下
閤使引皇帝至御幄服寬衣皂帶臣僚班齊分班引
入嚮殿合班立定引冊案上殿至褥位寶案次之設
於西階閤使引皇帝自西階升殿初行樂作至位立
樂止宣徽使揖皇帝鞠躬再拜陪位者皆再拜翰林

使執臺錢以進皇帝再拜引至神座前跪奠三樂作
進奠訖復位樂止又再拜陪位者皆再拜引皇帝于
神座前北面立捧冊函者去蓋進前跪冊案退置殿
西壁下引讀冊者進前俛伏跪自通全銜臣讀謚冊
讀訖俛伏興復位捧冊函者置于案上捧寶函者進
前跪讀寶官通銜跪讀訖引皇帝至褥位再拜陪位
者皆再拜禮畢引皇帝歸御幄初行樂作至御幄樂
止引臣僚分班出若皇太后奠酒依常儀

忌辰儀先一日奏忌辰榜子預寫名紙大紙一幅用陰
面後第三行書文武百僚宰臣某以下謹詣西上閤
門進名奉慰至日應拜大小臣僚竝皂衣皂鞵帶四
鼓至時於幕次前在京於僧寺班齊依位望闕叙立
直日舍人跪右執名紙在前班首以下皆再拜引退
名紙於宣徽使面付內侍奏聞

宋使祭奠弔慰儀太皇太后至葦塗殿服喪服太后於
北間南面垂簾坐皇帝於南間北面坐宋使至幕次

宣賜素服皂帶更衣訖引南北臣僚入班立定矮
檟以下竝上殿依位立先引祭奠使副捧祭文南洞
門入殿上下臣僚並舉哀至丹墀立定西上閤門使
自南階下受祭文上殿啓封置於香案哭止祭奠禮
物列殿前引使副南階上殿至褥位立揖再拜引大
使近前上香退再拜大使近前跪捧臺錢進奠酒三
教坊奏樂退再拜揖中書二舍人跪捧祭文引大使
近前俛伏跪讀訖舉哀引使副下殿立定哭止禮物

擔牀出畢引使副近南面北立勾弔慰使副南洞門
入四使同見大行皇帝靈再拜引出歸幕次皇太后
別殿坐服喪服先引北南面臣僚並於殿上下依位
立弔慰使副捧書匣右入當殿立閤門使右下殿受
書匣上殿奏封全開讀訖引使副南階上殿傳達弔
慰訖退下殿立引禮物擔牀過畢引使副近南北面
立勾祭奠使副入四使同見鞠躬再拜不出班奏聖
躬萬福再拜出班謝面天顏又再拜立定宣徽傳聖

旨撫問就位謝再拜引出歸幕次皇帝御南殿服喪服使副入見如見皇太后儀加謝遠接撫問湯藥再拜次宣賜使副并從人祭奠使副別賜讀祭文例物即日就館賜宴高麗夏國奉弔進賻等使禮畧如之道宗崩天祚皇帝問禮于耶律固宋國遣使弔及致祭歸贈皇帝喪服御游仙之北別殿使入門皇帝哭使者詣樞前上香讀祭文訖又哭有司讀遺詔慟哭使者出少頃復入陳賻贈于樞前皇帝入臨哭退更

衣御游仙殿南之幄殿使者入見且辭勅有司賜宴於館

宋使告哀儀皇帝素冠服臣僚皂袍鞵帶宋使奉書右入丹墀內立西上閤門使右階下殿受書匣上殿欄內鞠躬奏封全開封於殿西案授宰臣讀訖皇帝舉哀舍人引使者右階上欄內俛跪附奏起居訖俛興立皇帝宣問南朝皇帝聖躬萬福使者跪奏來時皇帝聖躬萬福起退舍人引使者右階下殿於丹墀西

面東鞠躬通事舍人通使者名某祇候見再拜不出
班奏聖躬萬福再拜出班謝面天顏再拜又出班謝
遠接撫問湯藥再拜贊祇候引出就幕次宣賜衣物
引從人入通名拜奏聖躬萬福出就幕賜衣如使者
之儀又引使者入面殿鞠躬贊謝恩再贊有勅賜宴
再拜贊祇候出就幕次宴引從人謝恩拜勅賜宴皆
如初宴畢歸館

宋使進遺留禮物儀百官昧爽朝服殿前班立宋遺留

使告登位使副入內門館伴副使引謝登位使就慕
次坐館伴大使與遺留使副奉書入至西上閣門外
趨位立閣使受書匣置殿西階下案引進使引遺留
物於西上閣門入即於廊下橫門出皇帝升殿坐宣
徽使押殿前班起居畢引宰臣押文武班起居引中
書令西階上殿奏宋使見膀子契丹臣僚起居控鶴
官起居遺留使副西上閣門入面殿立舍人引使副
西階上殿附奏起居訖引西階下殿於丹墀東西面

鞠躬通名奏聖躬萬福如告哀使之儀謝面天顏謝
逵接撫問湯藥引遺留使從人見亦如之次引告登
位使副捧書匣於東上閤門入面殿立閤使東階下
殿受書匣中書令讀訖舍人引使副東階上殿附奏
起居引下殿南面立告登位禮物入即於廊下橫門
出退西面鞠躬附奏起居謝面天顏逵接等皆如遺
留使之儀宣賜遺留登位兩使副併從人衣物如告
哀使應坐臣僚皆上殿就位立分引兩使副等於兩

廊立皇帝問使副銜涉不易丹墀內五拜各引上殿
祇候位立大臣進酒皇帝飲酒契丹通漢人贊殿上
臣僚皆拜稱萬歲贊各就坐行酒殺茶饌饅頭畢從
人出水飯畢臣僚皆起契丹通漢人贊皆再拜稱萬
歲各祇候獨引宋使副下殿謝五拜引出控鶴官門
外祇候報閤門無事供奉官捲班出

高麗夏國告終儀先期於行宮左右下御帳設使客幕
次於東南至日北面臣僚各常服其餘臣僚並朝服

入朝使者至幕次有司以嗣子表狀先呈樞密院准
備奏呈先引北面臣僚并矮襪已上近御帳相對立
其餘臣僚依班位序立引告終人使右入至丹墀面
殿立引右上立揖少前拜跪奏訖宣問若嗣子已立
恭身受聖旨奏訖復位嗣子未立不宣問引右下丹
墀面北鞠躬通班畢引面殿再拜不出班奏聖躬萬
福再拜出班謝面天顏復位再拜出班謝遠接復位
再拜贊祇候退就幕次再入依前面北鞠躬通辭再

拜叙戀闕再拜贊好去禮畢

遼史卷五十

欽定四庫全書

遼史卷五十一

元中書右丞相總裁托克托等修

志第二十

禮志三

軍儀

皇帝親征儀常以秋冬應敵制變或無時將出師必先告廟乃立三神主祭之曰先帝曰道路曰軍旅刑青

牛白馬以祭天地其祭常依獨樹無獨樹即所舍而行
之或皇帝服介冑祭諸先帝宮廟乃閱兵將行北牡
廐各一為禴祭將臨敵結馬尾祈拜天地而後入下
城克敵祭天地牲以白黑羊班師以所獲牡馬牛各
一祭天地出師以死囚還師以一課者植柱縛其上
于所向之方亂射之矢集如蝟謂之射鬼箭

臘儀臘十二月辰日前期一日詔司獵官選獵地其日
皇帝皇后焚香拜日畢設圍命獵夫張左右翼司獵

官奏成列皇帝皇后升舉多囉倫穆騰以酒二尊盤
殮進北南院大王以下進馬及衣皇帝降輿祭東畢
乘馬入園中皇太子親王率羣官進酒分兩翼而行
皇帝始獲兔羣臣進酒上壽各賜以酒至中食之次
親王大臣各進所獲及酒訖賜羣臣飲還宮應歷元
年冬漢遣使來賀自是遂以為常儀統和中罷之
出軍儀制見兵志

禮志四

賓儀

常朝起居儀昧爽臣僚朝服入朝各依幕次內侍奏班
齊先引京官班於三門外當直舍人放起居再拜各
祇候次引兩府以下文武官於丹墀內面殿立豎班
諸司并供奉官於東西道外相向立定當直閣使副
贊放起居再拜各祇候還幕次公服帝升殿坐兩
府并京官丹墀內聲喏各祇候教坊司同北班起居
畢奏事

燕京嘉寧殿西京同文殿朝服幘頭袍笏公服紫衫帽

正座儀皇帝升殿坐警聲絕契丹漢人殿前班畢各依位侍立次教坊班畢捲退京官班入拜畢揖於右橫街西依位班立次武班入拜畢依位立文班入拜畢依位立北班入起居畢於左橫街東序班立次兩府班入鞠躬通宰臣某官已下起居拜畢引上殿奏事已上六班起居竝七拜內有不帶節度使班首止

通名亦七拜捲班與常朝同直院有旨入文班留守司三司統軍司制置司謂之京官都部署司宮使副宮使都承以下令史北面主事以下隨駕諸司為武官館閣大理寺堂後以下御史臺隨駕間員令史司天臺翰林醫官院為文官

天慶二年冬教坊竝服袍

臣僚接見儀皇帝御座奏見勝子畢臣僚左入鞠躬通文武百僚宰臣某官以下祇候見引面殿鞠躬起居

凡七拜引班首出班謝面天顏復位舞蹈五拜鞠躬
宣答問制再拜宣訖謝宣諭五拜各祇候畢矮襖
以上引近前問聖躬萬福傳宣問跋涉不易鞠躬引
班舍人贊各祇候畢引右上準備宣問其餘臣僚竝
於右侍立

宣答云卿等久居鄉邑來奉乘輿時屬霜寒或云
炎蒸諒多勞止卿各平安好想宜知悉

問聖體儀皇帝行章車駕至巴納坐御帳臣僚公服問

聖躬萬福贊再拜各祇候奏事宜徽以下常服教坊與臣僚同

保大元年夏特旨通名再拜不稱宰臣

車駕還京儀前期一日宣徽以下橫班諸司閤門竝公服於宿帳祇候至日詰旦皇帝乘玉輅閤門宣諭軍民訖導駕時相以下進至內門閤副勘箭畢通事舍人鞠躬奏臣宣放仗禮畢

勘箭儀皇帝乘玉輅至內門北南臣僚於輅前對班立

勘箭官執雌箭門中立東上閤門使詣車前執雄箭
在車左立勾勘箭官進勘箭官揖進至車約五部面
車立閤使言受箭行勘勘箭官拜跪受箭舉手勘訖
鞠躬奏內外勘同閤使言准勅行勘勘箭官平立退
至門中舊位立當宵執箭贊軍將門仗官近前門使
官應聲開門舉聲兩邊齊出竝列左右立勘箭官舉
右手贊呈箭次贊內出喚仗御箭一隻准勅付左金
吾仗行勘贊合不合應合合贊同不同應同同同

訖勘箭官再進依位立鞠躬自通全銜臣某對御勘
箭同退門中立贊其箭謹付閤門使進入事畢其箭
授閤使轉付宣徽

宋使見皇太后儀宋使賀生辰正旦至日臣僚昧爽入
朝使者至幕次臣僚班齊皇太后御殿坐宣徽使押
殿前班起居畢捲班次契丹臣僚班起居畢引應坐
臣僚上殿就位立其餘臣僚不應坐者退於東面侍
立漢人臣僚東洞門入面西鞠躬舍人鞠躬通某以

下起居凡七拜畢贊各祇候引應坐臣僚上殿就位立
中書令大王西階上殿奏宋使并從人膀子訖就位
立其餘臣僚不應坐者退於西面侍立次引宋使副
六人於東洞門入丹墀內面殿齋立閣使自東階下
受書匣使人捧書匣者皆跪閣使搢笏立受書匣自
東階上殿欄內鞠躬奏封全訖授樞密開封宰臣對
皇太后讀訖引使副六人東階上殿欄內立使者揖
生辰節大使少前使者俛伏跪附起居訖起復位立

次引賀皇太后正旦大使附起居如前儀皇太后宣
問南朝皇帝聖躬萬福舍人揖生辰大使并皇太后
正旦大使少前皆跪惟生辰大使奏來時聖躬萬福
皆俛伏興引東階下殿丹墀內面殿齋立引進使引
禮物於西洞門入殿前置擔牀控鶴官起居四拜擔
牀於東便門出畢揖使副退於東方西面皆鞠躬舍
人鞠躬通南朝國信使某官某以下祇候見舞蹈五
拜畢不出班奏聖躬萬福再拜揖班首出班謝面天

顏訖復位舞蹈五拜畢贊各上殿祇候引各使副西階上殿就位勾從人兩洞門入面殿鞠躬通名贊拜起居四拜畢贊各祇候分班引兩洞門出若宣問使副跋涉不易引西階下殿丹墀內舞蹈五拜畢贊各上殿祇候引西階上殿就位立契丹舍人漢人閣使齋贊拜應坐臣僚并使副皆拜稱萬歲贊各就坐行湯行茶供過人出殿門揖臣僚并使副起鞠躬契丹舍人漢人閣使齋贊皆拜稱萬歲贊各祇候先引宋

使副西階下殿西洞門出次揖臣僚出畢報閣門無事皇太后起

宋使見皇帝儀宋使賀生辰正旦至日臣僚昧爽入朝使者至幕次奏班齊聲警皇帝升殿坐宣徽使押殿前班起居畢捲班出契丹臣僚班起居畢引應坐臣僚上殿就位立其餘臣僚不應坐者竝退於北面侍立次引漢人臣僚北洞門入面殿鞠躬舍人鞠躬通某官某以下起居皆七拜畢引應坐臣僚上殿就位立

引首相南階上殿奏宋使并從人膀子就位立臣僚
竝退於南面侍立教坊入起居畢引南使副北洞門
入丹墀內面殿立閣使北階下殿受書匣使人捧書
匣者跪閣使搢笏立受於北階上殿欄內鞠躬奏封
全訖授樞密開封宰相對皇帝讀訖舍人引使副北
階上殿欄內立揖生辰大使少前俛伏跪附起居俛
伏興復位立大使俛伏跪奏訖俛伏興退引北階下
殿揖使副北方南面鞠躬舍人鞠躬通南朝國信使

某官某以下祇候見起居七拜畢揖班首出班謝面
天顏舞蹈五拜畢出班謝遠接御筵撫問湯藥舞蹈
五拜畢贊各祇候引出歸幕次閣使傳宣賜對衣金
帶勾從人以下入見舍人贊班首姓名以下再拜不
出班奏聖躬萬福贊再拜稱萬歲贊各祇候引出舍
人傳宣賜衣使副并從人服賜衣畢舍人引使副入
丹墀內面殿鞠躬舍人贊謝恩拜舞蹈五拜畢贊上
殿祇候引使副南階上殿就位立勾從人入贊謝恩

拜稱萬歲贊有勅賜宴再拜稱萬歲贊各祇候承受
官引北廊下立御牀入大臣進酒皇帝飲酒契丹舍
人漢人閤使齋贊拜應坐并侍立臣僚皆拜稱萬歲
贊各祇候卒飲贊拜應坐臣僚皆拜稱萬歲贊各就
坐行酒親王使相使副共樂曲若宣令飲盡竝起立
飲訖放琰就位謝贊拜竝隨拜稱萬歲贊各就坐次
行方茵地坐臣僚等官酒若宣令飲盡贊謝如初殿
上酒一行畢贊廊下從人拜稱萬歲贊各就坐若傳

宣令飲盡竝拜稱萬歲贊各就坐殿上酒三行行茶
行般行膳酒五行候曲終揖廊下從人起贊拜稱萬
歲贊各祇候引出曲破臣僚并使副竝起鞠躬贊拜
應坐臣僚并使副皆拜稱萬歲贊各祇候引使副南
階下殿丹墀內舞蹈五拜畢贊各祇候引出次引衆
臣僚下殿出畢報閣門無事皇帝起聲蹕

曲宴宋使儀味爽臣僚入朝宋使至幕次皇帝升殿殿
前教坊契丹文武班皆如初見之儀宋使副綴翰林

學士班東洞門入面西鞠躬舍人鞠躬通文武百僚
臣某以下起居七拜謝宣召赴宴致詞訖舞蹈五拜
畢贊各上殿祇候舍人引大臣使相臣僚使副及方
茵朵殿應坐臣僚竝於西階上殿就位立其餘不應
坐臣僚竝於西洞門出勾從人入起居謝賜宴兩廊
立如初見之儀二人監踐教坊再拜贊各上殿祇候
御牀入大臣進酒舍人閣使贊拜行酒皆如初見之
儀次行方茵朵殿臣僚酒傳宣飲盡如常儀殿上酒

一行畢兩廊從人行酒如初殿上行餅茶畢教坊致語揖臣僚使副并廊下從人皆起立候口號絕揖臣僚等皆鞠躬贊拜殿上應坐并侍立臣僚皆拜稱萬歲贊各就坐次贊廊下從人拜亦如之歇宴揖臣僚起立御牀出皇帝起入閣引臣僚東西階下殿還幕次內賜花承受官引從人出賜花亦如之簪花畢引從人復兩廊位立次引臣僚使副兩洞門入復殿上位立皇帝出閣復坐御牀入揖應坐臣僚使副及侍

立臣僚鞠躬贊拜稱萬歲贊各就坐贊兩廊從人亦如之行單茶行酒行膳行果殿上酒九行使相樂曲聲絕揖兩廊從人起贊拜稱萬歲贊各好去承受引出曲破殿上臣僚使副皆起立贊拜稱萬歲贊各祇候引臣僚使副東西階下殿契丹班謝宴出漢人并使副班謝宴舞蹈五拜畢贊各好去引出畢報閣門無事皇帝起

賀生辰正旦宋使朝辭太后儀臣僚使副班齊如曲宴

儀皇太后升殿坐殿前契丹文武起居上殿畢宰臣
奏宋使副從人朝辭膀子畢就位立舍人引使副北
洞門入面南鞠躬舍人鞠躬通南朝國信使某官某
以下祇候辭再拜不出班奏聖躬萬福再拜出班戀
闕致詞訖又再拜贊各上殿祇候舍人引南階上殿
就位立引從人贊姓名再拜奏聖躬萬福再拜稱萬
歲贊各好去引出殿上揖應坐臣僚并使副就位鞠
躬贊拜稱萬歲贊各就坐行湯行茶畢揖臣僚并南

使起立與應坐臣僚鞠躬贊拜稱萬歲贊各祇候立
引使副六人於欄內拜跪受書匣畢直起立揖少前
鞠躬受傳答語訖退於北階下殿丹墀內面殿鞠躬
舍人贊各好去引出臣僚出

賀生辰正旦宋使朝辭皇帝儀臣僚入朝如常儀宋使
至幕次於外賜從人衣物皇帝升殿宣徽契丹文武
班起居上殿如曲宴儀中書令奏宋使副并從人朝
辭膀子畢臣僚竝於南面侍立教坊起居畢舍人引

使副六人北洞門入丹墀北方面南鞠躬舍人鞠躬
通南朝國信使某官某以下祇候辭再拜起居戀闕
如辭皇太后儀贊各祇候平身立揖使副鞠躬宣徽
贊有勅使副再拜鞠躬平身立宣徽使贊各賜卿對
衣金帶足段弓箭鞍馬等想宜知悉使副平身立揖
大使三人少前俛伏跪搢笏閣門使授別錄賜物過
畢俛起復位立揖副使三人受賜亦如之贊謝恩舞
蹈五拜贊上殿祇候舍人引使副南階上殿就位立

引從人贊謝恩再拜起居再拜贊賜宴再拜皆稱萬
歲贊各祇候承受引兩廊出御牀入皇帝飲酒舍人
閤使贊臣僚使副拜稱萬歲皆如曲宴應坐臣僚拜
稱萬歲就坐行酒樂曲方茵兩廊皆如之行散行茶
行膳亦如之行饅頭畢從人起如登位使之儀曲破
臣僚使副皆起立拜稱萬歲如辭太后之儀使副下
殿舞蹈五拜贊各上殿祇候引北階上殿欄內立揖
生辰正旦大使二人少前齊跪受書畢起立揖罄折

受起居畢退引北階下殿丹墀內並鞠躬舍人贊各
好去引南洞門出次引殿上臣僚南北洞門出畢報

閣門無事

高麗使入見儀臣僚常服起居應上殿臣僚殿上序立
閣門奏膀子引高麗使副面殿立引上露臺拜跪附
奏起居訖拜起立閣門傳宣王詢安否使副皆跪大
使奏臣等來時詢安引下殿面殿立進奉物入列置
殿前控鶴官起居畢引進使鞠躬通高麗國王詢進

奉宣徽使殿上贊進奉赴庫馬出擔牀出畢引使副
退面西鞠躬舍人鞠躬通高麗國謝恩進奉使某官
某以下祇候見舞蹈五拜不出班奏聖躬萬福再拜
出班謝面天顏五拜出班謝遠接湯藥五拜贊各祇
候使副私獻入列置殿前控鶴官起居引進使鞠躬
通高麗國謝恩進奉某官某以下進奉宣徽使殿上
贊如初引使副西階上殿序立皇帝不入御牀臣僚
伴酒契丹舍人通漢人閣使贊再拜稱萬歲各就坐

酒三行殺膳二味若宣令飲盡就位拜稱萬歲贊各就坐殺膳不贊起再拜稱萬歲引下殿舞蹈五拜贊各祇候引出於幕次內別差使臣伴宴起宣賜衣物訖遙謝五拜畢歸館

曲宴高麗使儀臣僚入朝班齊皇帝升殿宣徽教坊控鶴文武班起居皆如常儀謝宣宴如宋使儀贊各上殿祇候契丹臣僚謝宣宴勾高麗使入面南鞠躬舍人鞠躬通高麗國謝恩進奉使某官某以下起居謝

宣宴共十二拜贊各上殿祇候臣僚使副就位立大
臣進酒契丹舍人通漢人閤使贊上殿臣僚皆拜贊
各祇候進酒大臣復位立贊應坐臣僚拜贊各就坐
行酒若宣令飲盡贊再拜贊各就坐教坊致語臣僚
皆起立口號絕贊再拜贊各就坐凡拜皆稱萬歲曲
破臣僚起下殿契丹臣僚謝宴中書令以下謝宴畢
引使副謝七拜贊各好去控鶴官門外祇候報閤門
無事供奉官捲班出來日問聖體

高麗使朝辭儀臣僚起居上殿如常儀閣門奏高麗使
朝辭膀子起居戀闕如宋使之儀贊各上殿祇候引
西階上殿立契丹舍人贊拜稱萬歲贊各就坐中書
令以下伴酒三行般膳二味皆如初見之儀既謝贊
有勅宴五拜贊各好去引出於幕次內別差使臣俾
宴畢賜衣物跪受遙謝五拜歸館

西夏國進奉使朝見儀臣僚常朝畢引使者左入至丹
墀面殿立引使者上露臺立揖少前拜跪附奏起居

訖俛興復位閤使宣問某安否鞠躬聽旨跪奏某安
俛伏興退復位引左下至丹墀面殿立禮物右入左
出畢閤使鞠躬通某國進奉使姓名候見共一十七
拜贊祇候平立有私獻過畢揖使者鞠躬贊進奉收
訖贊祇候引左上殿就位立臣僚使者齋聲啗酒三
行引使左下至丹墀謝宴五拜畢贊有勅宴五拜祇
候引右出禮畢於外賜宴客省伴宴仍賜衣物

西夏使朝辭儀常朝畢引使者左入通某國某使祇候

辭再拜不出班起居再拜出班總闕致詞復再拜賜
衣物謝恩如常儀若賜宴五拜畢贊好去引右出

遼史卷五十一

欽定四庫全書

遼史卷五十二

元中書右丞相總裁托克托等修

志第二十一

禮志五

嘉儀上

皇帝受冊儀前期一日尚舍奉御設幄於正殿北牖下
南面設御坐奉禮郎設官僚客使幕次於東西朝堂

太樂令設宮懸於殿庭舉麾位在殿第二重西階上
東向乘黃令陳車輅尚輦奉御陳輿輦尚舍奉御設
解劍席于東西階設文官六品已上位橫街南東方
西向武官五品已上位橫街南西方東向皆北上重
行每等異位將士各勒所部六軍仗屯諸門金吾仗
黃麾仗陳于殿庭至日押冊官引冊自西便門入置
冊案西階上通事舍人引侍從班入就位侍中東階
下解劍履上殿欄外俛俯跪奏中嚴下殿劍履復位

立閣使西階上殿欄外跪請木契面殿鞠躬奏奉敕
喚仗殿中監少監殿中丞等押金吾四色仗入位臣
僚後協律郎入就舉麾位符寶郎詣閣奉迎通事舍
人引文官四品至六品武官三品至五品就門外位
皇帝御輦至宣德門宣徽使押內諸司班起居引皇
帝至閣服袞冕侍中東階下解劍履上殿版奏外辦
太常博士引太常卿太常卿引帝內諸司出協律郎
舉麾太樂令令撞黃鍾之鐘左右鐘皆應工人鼓祝

樂作皇帝即御坐宣徽使贊扇合樂止贊簾捲扇開
符寶郎奉寶進左右金吾報平安通事舍人引文官
三品武官二品已上入門樂作就相向位畢樂止通
事舍人引侍從班南班文官三品武官二品已上合
班北向東班西上西班東上起居七拜分班各復位
通事舍人引押冊官押冊自西階下至丹墀當殿置
香案冊案置冊訖樂作就位樂止捧冊官近後東西
相對立舍人引侍從班并南班合班北向如初贊再

拜在位者皆再拜舞蹈五拜分班各復位如初捧冊
官就西階下解劍席解劍履捧冊西階上殿樂作罍
冊御坐前東西立北向捧冊官西牖下立北上樂止
讀冊官出班當殿立贊再拜三呼萬歲就西階下解
劍席解劍履西階上殿欄內立當御坐前侍中取冊
捧冊官捧冊匣至讀冊官前跪相對捧冊讀冊官俛
伏跪讀訖俛伏興捧冊官跪左膝以冊授侍中侍中
受冊以冊授執事者降自西階劍履訖復當殿位贊

再拜三呼萬歲復分班位舍人引侍從班南班合班
北向如初贊拜在位者皆拜舞蹈鞠躬如初通事舍
人引班首西階下解劍履上殿樂作就欄內位樂止
俛伏跪通全銜臣某等致詞稱賀訖伏興興降西階
下帶劍納烏樂作復位樂止贊拜在位者皆再拜舞
蹈五拜鞠躬侍中臨軒西向稱有制皆再拜侍中宣
答訖贊皆再拜舞蹈五拜分班各復位三品已上出
樂作出門畢樂止侍中當御坐俛伏跪通全銜奏禮

畢俛伏興退東階下殿帶劍納履復位宣徽使贊扇
合下簾太常博士太常卿引皇帝起樂作至閤樂止
舍人引文官四品武官三品以下出門外分班立次
引侍從班出次兵部吏部出次金吾出次起居郎舍
人出次殿中監少監押金吾細仗出仍位臣僚後次
東西上閤門使於丹墀內鞠躬奏衙內無事捲班出
閤門使丹墀內鞠躬揖奉敕放仗出門外文武班中
間立喚承受官承受官聲諾至閤使後鞠躬揖閤使

鞠躬稱奉敕放仗承受聲諾鞠躬揖平身立引聲奉
敕放仗聲絕趨退文武合班再拜舍人一員攝詞令
官殿前鞠躬揖稱奉敕放黃麾仗出放金吾仗亦如
之翼日文武臣僚入問聖躬

太平元年行此儀大畧遵唐晉舊儀又有上契丹
冊儀以蘇爾威汗柴冊禮合唐禮雜就之又有上
漢冊儀與此儀大同小異加以上寶儀

冊皇太后儀前期陳設於元和殿如皇帝受冊之儀至

日皇帝御弘政殿冊入侍從班入門外金吾列仗文武分班侍中解劍奏中嚴宣徽使請木契喚仗皆如之樂工入閣使門外文武班中間立喚承受官聲諾趨至閣使後立閣使鞠躬揖稱奉敕喚仗承受官鞠躬聲諾揖引聲奉敕喚仗文武合班再拜殿中監押仗入文武官入亦如之宣徽使押內諸司供奉官天橋班候皇太后御紫宸殿乘平頭輦童子女童隊樂引至金鑾門閣使奏內諸司起居訖贊引駕自下先

行至元和殿皇太后入西北隅閣內更衣侍中解劍
上殿奏外辨宣徽受版入奏侍中降復位協律郎舉
麾樂作太樂令太常卿導引皇太后升坐宣徽使贊
扇合簾捲扇開樂止符寶郎奉寶置皇太后坐右左
右金吾大將軍對揖鞠躬奏軍國內外平安東上閣
門副使引丞相東門入西上閣門副使引親王西門
入通事舍人引文武班入如儀樂作至位樂止文武
班趨進相向再拜退復位東西上閣門使宣徽使自

弘政殿引皇帝御肩輿至西便門下引入門樂作至
殿前位樂止宣徽使贊皇帝拜問皇太后聖躬萬福
拜皇帝御西閣坐合班起居如儀北府宰相押冊中
書樞密令史八人舁冊東西上閣門使引冊宣徽使
引皇帝送冊樂作至殿前置冊位樂止宣徽使贊皇
帝再拜稱萬歲羣臣陪位揖翰林學士四人大將軍
四人舁冊皇帝捧冊行三舉武授冊舁之西階上殿
樂作置太后坐前樂止皇帝冊西面東立舍人引丞

相當殿再拜三呼萬歲解劍西階上殿樂作至讀冊
位樂止俛伏跪讀冊訖俛伏三呼萬歲復班位宣徽
使引皇帝下殿樂作至殿前位樂止皇帝拜舞蹈拜
訖引皇帝西階上殿至皇太后坐前位俛跪致詞訖
俛伏興引西階下至殿前位拜舞蹈拜鞠躬侍中臨
軒宣太后答稱有制皇帝再拜宣訖引皇帝上殿樂
作至西閣樂止丞相親王侍從文武合班贊拜舞蹈
三呼萬歲如儀丞相上賀侍中宣答如儀丞相以下

出舉樂出門樂止侍中奏禮畢宣徽索扇扇合下簾
皇太后起舉樂入閣樂止文武官出門外分班侍從
兵部吏部起居金吾仗出如儀閣使奏放仗皆如皇
帝受冊之儀

冊皇后儀至日北南臣僚內外命婦詣端拱殿幕次皇
后至閣侍中奏中嚴引命婦班入就東西相向位立
皇帝臨軒命使發冊使副押冊至端拱殿門外幕次
侍中奏外辦所司承旨索扇扇上舉麾樂作皇后出

閣升坐扇開簾捲偃麾樂止引命婦合班面殿起居
八拜皇后降坐樂作至殿下褥位樂止引冊入置皇
后褥位前侍中傳宣皇后四拜命婦陪位皆拜引讀
冊官至皇后褥位前俛伏跪讀訖皇后四拜陪位者
皆拜引皇后升殿使臣引冊置皇后坐前冊案退西
向侍立命婦當殿稱賀四拜引班首東階上殿致詞
訖東階下殿復位四拜侍中奏宣答稱有教旨四拜
宣答訖四拜班首上殿進酒皇后賜押冊使副等酒

訖侍中奏禮畢承旨索扇樂作皇后起入閣樂止分引命婦等東西門出

冊皇太子儀前期一日設幄坐于宣慶殿設文武官幕次于朝堂并殿庭板位太樂令陳宮縣皆如皇帝受冊儀守宮設皇太子次于朝堂北西向乘黃令陳金輅朝堂門外西向皇太子儀仗笳簫鼓吹等陳宣慶門外典儀設皇太子版位于殿橫街南近東北向設文武官五品以上位于樂縣東西餘官如常儀至日

門下侍郎奉冊中書侍郎奉寶綬各置于案令史二人絳服對舉案立寶案在橫街北西向冊案在北門下侍郎中書侍郎竝立案後侍中版奏中嚴皇太子遠遊冠絳紗袍秉珪出太子舍人引入就版位北面殿立東宮官三師以下皆從立皇太子東南西向太子入門樂作至位樂止典儀贊皇太子再拜在位者皆再拜中書令立太子東北西向門下侍郎引冊案中書侍郎取冊進授中書令退復位傳宣官稱有制

皇太子再拜傳宣訖再拜中書令跪讀冊訖俛伏興
皇太子再拜受冊退授左庶子中書侍郎取寶進授
中書令皇太子進受寶退授左庶子中書令以下退
復位舁案者以案退典儀贊再拜皇太子拜在位者
皆再拜太子舍人引皇太子退樂作出門樂止侍中
奏禮畢皇太子升金輅左庶子以下夾侍儀仗鼓吹
等竝列宣慶門外三師三少諸宮臣於金輅前後導
從鳴鑣而行還東宮宮庭先設仗衛如式至宮門鑣

止皇太子降金輅舍人引入就位坐文武宮臣序班
稱賀禮畢

冊王妃公主儀至日押冊使副并讀冊等官押冊東便
門入持節前導至殿冊案置橫街北少東引使副等
面殿立而鞠躬侍中臨軒稱有制皆再拜鞠躬宣制
訖舞蹈五拜引冊於宣慶門出使副等押領儀仗冊
案赴各私第廳前向闕陳列設傳宣受冊拜褥冊案
置褥左去幕蓋使副案右序立受冊者就位立傳宣

稱有制再拜宣制畢舁冊人舉冊匣於褥前跪捧引
讀冊者與受冊者皆俛伏跪讀訖皆俛伏興受冊者
謝恩國王五拜王妃公主四拜若冊禮同日先上皇
太后冊寶次臨軒同制遣使冊皇后諸王妃主次冊
皇太子

皇帝納后之儀擇吉日至日后族畢集詰旦后出私舍
坐于堂皇帝遣使及媒者以牲酒饗餼至門執事者
以告使及媒者入謁再拜平身立少頃拜進酒于皇

后次及后之父母宗族兄弟酒徧再拜納幣致詞再拜訖后族皆坐特哩袞夫人四拜請就車后辭父母伯叔父母兄各四拜宗族長者皆再拜升車父母飲后酒致戒詞徧及使者媒者送者發軔伯叔父母兄飲后酒如初教坊遮道贊祝后命賜以物后族追拜進酒遂行將至宮門宰相傳敕賜后酒徧及送者既至特哩袞率皇族奉迎再拜皇后車至便殿東南七步止特哩袞夫人請降車負銀罍捧膝履黃道行

後一人張羔裘若襲之前一婦人捧鏡却行置鞍于道后過其上乃詣神主室三拜南北向各一拜酹酒向謁者一拜起居訖再拜次詣舅姑御容拜奠酒選皇族諸婦宜子孫者再拜之授以嬰滕又詣諸帝御容拜奠酒神賜襲衣珠玉珮飾拜受服之后姊若妹陪拜者各賜物皇族迎者后族送者徧賜酒皆相偶飲訖后坐別殿送后者退食于次媒者傳旨命送后者列于殿北竢皇帝即御坐選皇族尊者一人當與

坐主婚禮命執事者往來致辭于后族引后族之長率送后者升當御坐皆再拜又一人少進附奏送后之詞退復位再拜后族之長及送后者向當輿者三拜南北向各一拜向謁者一拜后族之長跪問聖躬萬福再拜復奏送后之詞又再拜當輿者與媒者行酒三周命送后者再拜皆坐終宴翼日皇帝晨興詣先帝御容拜奠酒訖復御殿宴后族及羣臣皇族后族偶飲如初百戲角觝戲馬較勝以為樂又翼日皇

帝御殿賜后族及嬪送后者各有差受賜者再拜進酒再拜皇帝御別殿有司進皇后服飾之籍酒五行送后者辭訖皇族獻后族禮物后族以禮物謝當與者禮畢

公主下嫁儀選公主諸父一人為婚主凡當與者媒者致詞之儀自納幣至禮成大畧如納后儀擇吉日詰旦媒者趣向主之家詣宮族皇帝皇后御便殿率其族入見進酒訖命皇族與尚主之族相偶飲翼日尚

主之家以公主及婿率其族入見致宴于皇帝皇后
獻贐送者禮物訖朝辭賜公主青幃車二螭頭蓋部
皆飾以銀駕駝送終車一車樓純錦銀螭懸鐸後垂
大氊駕牛載羊一謂之祭羊擬送終之具至覆尸儀
物咸在賜其婿朝服四時襲衣鞍馬凡所需無不備
選皇族一人送至其家

親王女封公主者婚儀倣此以親疏為差降

遼史卷五十二

遼史卷五十二考證

受冊儀奏衙內無事 按禮志載禮儀畢輒報閤門無事此獨書衙內續通考載此儀云奏衙門內事疑俱係閤門之訛謹仍其舊而附證于此

納后儀 按原本國語解凡納后即族中選尊者一人當輿而坐以主其禮謂之輿姑送后者拜而致敬謂之拜輿禮志所載向當輿者三拜云云即拜輿禮也第考聖宗本紀統和十二年九月行拜輿禮又興宗

本紀重熙五年五月辛北院大王帳拜奧二者皆無
納后事據此則拜奧禮疑不專為納后也

公主下嫁儀 按興宗本紀重熙十六年定公主行婦
禮于舅姑儀惜志不載遂無可考

遼史卷五十二考證

欽定四庫全書

史部

遼史卷五十六

三五

詳校官庶吉士_臣何道冲

給事中_臣查善長覆勘

總校官編修_臣朱鈐

校對官中書_臣程炎

謄錄監生_臣方炳

欽定四庫全書

遼史卷五十三

元中書右丞相總裁托克托等修

志第二十二

禮志六

嘉儀下

皇太后生辰朝賀儀至日臣僚入朝國使至幕班齊如
常儀皇太后升殿坐皇帝東面側坐契丹舍人殿上

通名契丹漢人臣僚宋使副綴翰林學士班東西兩
洞門入合班稱賀班首上殿祝壽分班引出皆如正
旦之儀教坊起居七拜契丹漢人臣僚入進酒皆如
正旦之儀惟宣答稱聖旨皇帝降御座進奉皇太后
生辰禮物過畢皇帝殿上再拜殿下臣僚皆再拜皇
帝升御座引臣僚分班出引中書令北大王西階上
殿奏契丹臣僚進奉次漢人臣僚并諸道進奉控鶴
官置擔牀起居四拜畢引進使鞠躬通文武百僚某

官某以下高麗夏國諸道進奉宣徽使殿上贊進奉
各付所司控鶴官聲喏擔牀過畢契丹漢人臣僚以
次謝五拜贊各祇候引出教坊諸道進奉使謝如之
契丹臣僚謝宣宴引上殿就位立漢人臣僚并宋使
副東洞門入面西謝宣宴如正旦儀贊各上殿祇候
臣僚使副上殿就位立亦如之監殘教坊上殿從人
入東廊立皆如之御牀入皇帝初進酒臣僚就位陪
拜皇太后飲酒殿上應坐侍立臣僚皆拜稱萬歲贊

各祇候立皇太后卒飲手賜皇帝酒皇帝跪卒飲退
就褥位再拜臣僚皆陪拜若皇帝親賜使相臣僚宋
使副酒皆立飲皇帝升坐贊應坐臣僚并使副皆拜
稱萬歲贊各就坐行方朔朶殿臣僚酒如正旦儀一
進酒兩廊從人拜稱萬歲各就坐親王進酒如正旦
儀若皇太后手賜親王酒跪飲訖退露臺上五拜贊
祇候殿上三進酒行餅茶訖教坊跪致語揖臣僚使
副廊下從人皆立口號絕贊拜亦如之行茶行殽膳

皆如之大饌入行粥盃殿上七進酒使相臣僚樂曲
終揖廊下從人起拜稱萬歲各好去承受官引兩門
出曲破揖臣僚使副起鞠躬贊拜皆拜稱萬歲贊各
祇候引臣僚使副下殿契丹臣僚謝宴畢出漢人臣
僚使副舞蹈五拜畢贊各好去出洞門畢報閤門無
事皇太后皇帝起

應聖節宋遣使來賀生辰正旦始制此儀故詳見
賓儀

凡五拜拜興再拜興跪搯笏三舞蹈三叩頭出笏就拜興拜興再拜興其就拜亦曰俛伏興

賓儀臣僚皆曰坐於此儀曰高禡與方禡別

皇帝生辰朝賀儀臣僚國使班齊皇帝升殿坐臣僚使副入合班稱賀合班出皆如皇太后生辰儀中書令北大王奏諸道進奉表目教坊起居七拜臣僚東西門入合班再拜贊進酒班首上殿進酒宣徽使宣答羣臣謝宣諭分班奏樂皇帝卒飲合班班首下殿分

班出皆如正旦之儀進奉皆如皇太后生辰儀皇帝
詣皇太后殿近上皇族外戚大臣竝從奉迎太后即
皇帝殿坐皇太后御小輦皇帝輦側步從臣僚分行
序引宣徽使諸司閤門攢隊前引教坊動樂控鶴官
起居四拜引駕臣僚於山樓南方立候皇太后入閤
揖使副并臣僚入幕次皇太后升殿坐皇帝東方側
坐引契丹漢人臣僚使副兩洞門入合班起居舞蹈
五拜贊各祇候面殿立皇帝降御座殿上立進皇太

后生辰物過畢皇帝殿上再拜殿上下臣僚皆拜皇
帝升御座引臣僚分班出契丹臣僚入謝宣宴漢人
臣僚使副入通名謝宣宴上殿就位不應坐臣僚出
從人入皆如儀御牀入皇帝初進皇太后酒皇太后
賜皇帝酒皆如皇太后生辰儀贊各就坐行酒宣飲
盡就位謝如儀殿上一進酒畢從人入就位如儀親
王進酒行餅茶教坊致語如儀行茶行殺膳如儀七
進酒使相樂曲終從人起曲破臣僚使副起餘皆如

正旦之儀

皇后生辰儀臣僚昧爽朝皇帝皇后大帳前拜日契丹
漢人臣僚陪拜皇帝升殿坐皇后再拜臣僚殿下
班陪拜皇帝賜皇后生辰禮物皇后殿上謝再拜臣
僚皆拜契丹舍人通名契丹漢人臣僚以次入賀
入舍人贊舞蹈五拜起居不表聖躬萬福贊再拜
首上殿拜跪自通全銜祝壽訖引下殿復位鞠躬
贊舞蹈五拜贊各祗候引宰臣一員上殿奏百僚諸

進表目教坊起居七拜不賀控鶴官起居四拜諸道
押衙附奏起居賜宴共八拜契丹漢人合班進壽酒
舞蹈五拜引大臣一員上殿欄外褥位搢笏執臺毯
進酒皇帝皇后受踐退復褥位授臺出笏欄內拜跪
自通全銜祝壽臣等謹進千萬歲壽酒訖引下殿褥
位舞蹈五拜鞠躬宣徽使奏宣答如儀引上殿搢笏
執臺皇帝皇后飲殿下臣僚分班教坊奏樂皆拜稱
萬歲卒飲皇帝皇后授踐引下殿舞蹈五拜贊各祇

候引出臣僚進奉如儀宣宴如儀教坊監璫臣僚上
殿祇候如儀皇后進皇帝酒殿上贊拜侍臣僚皆拜
皇帝受璫皆拜皇后坐契丹舍人漢人閤使殿上贊
拜皆拜稱萬歲贊各就坐大臣進皇帝皇后酒行酒
如儀酒三行行殺行膳又進皇帝皇后酒酒再行大
饌入行粥教坊致語臣僚皆起立口號絕贊拜稱萬
歲引下殿謝宴引出皆如常儀

進士接見儀其日舉人從時相至御帳側通名膀子與

時相膀子同奏訖時相朝見如常儀畢揖進士第一名以下丹墀內面殿鞠躬通名四拜贊各祇候皆退若有進文字者不退奉卷平立閣門奏受跪左膝授訖直起退禮畢

進士賜等甲敕儀臣僚起居畢讀卷官奏訖於左方依等甲唱姓名序立閣使交收敕牒閣使奏引至丹墀依等甲序立閣使稱有敕再拜鞠躬舍人宣敕各依等甲賜卿敕牒一道想宜知悉揖拜各跪左膝受敕

訖鞠躬皆再拜各祇候分引左右相向侍立候奏事
畢引兩階上殿就位齊聲喏賜坐酒三行起聲喏如
初退揖出禮畢牌印郎君行酒閣使勸飲

進士賜章服儀皇帝御殿臣僚公服引進士入東方面
西再拜揖就丹墀位面殿鞠躬閣使稱有敕再拜鞠
躬舍人宣敕各依等甲賜卿敕牒一道兼賜章服想
宜知悉揖再拜跪受敕訖再拜退引至章服所更衣
訖揖復丹墀位鞠躬贊謝恩舞蹈五拜各祇候殿東

亭內序立聲喏坐賜宴簪花宣閣使一員閣門三人或二人勸飲終日禮畢

宰相中謝儀皇帝常服升殿坐諸班起居如常儀應坐臣僚上殿其餘臣僚殿下東西侍立皆如宋使初見之儀引中謝官左入至丹墀面西立舍人當殿鞠躬通新受具官姓名祇候中謝宣徽殿上索通班舍人就贊禮位贊某官至宣徽贊通班舍人二人對立揖中謝官鞠躬贊就拜位舍人二人引面殿鞠躬贊拜

中謝官舞蹈五拜不出班奏聖躬萬福贊再拜揖出
班跪敘官致詞訖伏興復位贊拜舞蹈五拜又出
班中謝致詞如初儀共十有七拜贊祇候引右階上
殿就位揖應坐臣僚聲喏坐供奉官行酒傳宣飲盡
臣僚搢笏執璣起位後立飲置璣出笏贊拜臣僚皆
再拜贊各坐搢笏執璣授供奉官璣酒三行揖應坐
臣僚聲喏立引中謝官右陛下殿至丹墀面殿鞠躬
贊拜舞蹈五拜引右出臣僚皆出丞相樞密使同餘

官不升殿賜酒不帶節度使不通班止通名七拜衆
謝班首一人出班中謝

拜表儀其日先於東上閤門陳設氈位分引南北臣僚
諸國使副於氈位合班通事舍人二人舁表案置班
首前揖鞠躬再拜平身中書舍人立案側班首跪搢
笏興捧表跪左膝以表授中書舍人出笏就拜興再
拜中書舍人復置表案上通事舍人舁表案於東上
閤門入捲班分引出禮畢

元日皇帝不御坐行此儀餘應上表有故皆倣此
賀生皇子儀其日奉先帝御容設正殿皇帝御八角殿
升坐聲警畢北南宣徽使殿階上左右立北南臣僚
金冠盛服合班入班首二人捧表立讀表官先於左
階上側立二宣徽使東西階下殿受表捧表者跪左
膝授訖就拜興再拜各祇候二宣徽使俱左階上授
讀表官讀訖揖臣僚鞠躬引北面班首左階上殿欄
內稱賀訖引左階下殿復位舞蹈五拜禮畢

賀祥瑞儀聲警北南臣僚金冠盛服合班立班首二人
各奉表賀北南宣徽使左階下殿受表上殿授讀表
大臣讀訖揖殿下臣僚鞠躬五拜畢鞠躬引班首二
人左階上殿欄內拜跪稱賀致詞訖引左階下殿復
位五拜畢鞠躬宣答聽制訖再拜鞠躬謝宣諭五拜
畢各祗候分班侍立禮畢兩府奏事如常

乾統六年木葉山瑞雲見始行此儀天慶元年天
雨穀謝宣諭後趙王進酒教坊動樂臣僚酒一行

禮畢奏事

賀平難儀皇帝皇后升殿坐北南臣僚并命婦合班五拜揖班首二人出班俛跪搢笏執表舁案近前閣使受表置案上皆再拜通事舍人二人舁案左階上殿置露臺上讀表官受入讀表對御讀訖臣僚殿下五拜鞠躬引班首二人左右階上殿欄內竝立先引北面班首少前跪致詞訖退復褥位次引南面班首亦如之畢分引左右階下殿復位五拜鞠躬宣徽稱有

敕再拜宣答內難已平與公等內外同慶謝宣諭五
拜捲班臣僚從皇帝命婦從皇后詣皇太后殿見先
帝御容陪位皆再拜皇太后正坐稱賀共十拜竝引
上殿賜宴如儀

平難之儀道宗清寧九年太叔重元謀逆仁懿太
后親率衛士與逆黨戰事平因制此儀

正旦朝賀儀臣僚并諸國使昧爽入朝奏班齊皇帝升
殿坐契丹舍人殿上通訖引契丹臣僚東洞門入引

漢人臣僚并諸國使西洞門入合班舞蹈五拜鞠躬
平身引親王東階上殿欄內褥位俛伏跪自通銜
臣某等祝壽訖伏興退引東階下殿復位舞蹈五拜
畢鞠躬宣徽使殿上鞠躬奏臣宣答稱有敕班首以
下聽制訖再拜鞠躬宣徽傳宣云履新之慶與公等
同之舍人贊謝宣諭拜舞蹈五拜贊各祇俟分班引
出引班首西階上殿奏表目訖教坊起居賀十二拜
畢贊各祇候引契丹漢人臣僚并諸國使東西洞門

入合班再拜贊進酒引親王東階上殿就欄內褥位
搢笏執臺錢進酒訖退復褥位置臺出笏少前俛跪
自通全銜臣某等謹進千萬歲壽酒俛伏興退復褥
位與殿下臣僚皆再拜鞠躬俟宣徽使殿上鞠躬奏
臣宣答稱有制親王以下再拜如初儀傳宣云飲公
等壽酒與公等內外同慶舍人贊謝宣諭如初贊各
祇候親王搢笏執臺殿下臣僚分班皇帝飲酒教坊
奏樂殿上下臣僚皆拜稱萬歲贊各祇候樂止教坊

再拜皇帝卒飲親王進受踐復褥位置臺踐出笏揖
臣僚合班引親王東階下殿復位鞠躬再拜贊各祇
候分班引出皇帝起詣皇太后殿臣僚并諸國使皆
從皇太后升殿皇帝東方側坐引契丹漢人臣僚并
諸國使兩洞門入班稱賀進酒皆如皇帝之儀畢引
出教坊入起居進酒亦如之皇太后宣答稱聖旨契
丹班謝宣宴上殿就位立漢人臣僚并諸國使東洞
門入丹墀東方而西鞠躬舍人鞠躬通文武百僚宰

臣某已下謝宣宴再拜出班致詞訖退復位舞蹈五
拜贊各上殿祇候引宰臣以下并諸國使副方袞朶
殿臣僚西階上殿就位立不應坐臣僚竝於西洞門
出二人監踐教坊再拜贊各上階下殿謝宴如皇太
后生辰儀

冬至朝賀儀臣僚班齊如正旦儀皇帝皇后拜日臣僚
陪位再拜皇帝皇后升殿坐契丹舍人通臣僚入合
班親王祝壽宣答皆如正旦之儀謝訖舞蹈五拜鞠

躬出班奏聖躬萬福復位再拜鞠躬班首出班俛伏
跪祝壽訖伏興舞蹈五拜鞠躬贊各祇候分班不出
合班御牀入再拜鞠躬贊進酒臣僚平身引親王左
階上殿就欄內褥位搢笏執臺璣進酒皇帝皇后受
璣訖退就褥位置臺出笏俛伏跪少前自通銜臣
某等謹進千萬歲壽酒俛伏興退復褥位再拜鞠躬
殿下臣僚皆再拜鞠躬宣答如正旦儀親王搢笏執
臺分班皇帝皇后飲酒奏樂殿上下臣僚皆拜稱萬

歲壽樂止教坊再拜臣僚合班親王進受踐至褥位
置臺踐出笏引左階下殿御牀出親王復丹墀位再
拜鞠躬贊祇候分班引出班首右階上殿奏表目進
奉諸道進奉教坊進奉過訖贊進奉收班首舞蹈五
拜鞠躬贊各祇候班首出臣僚復入合班謝舞蹈五
拜鞠躬贊各祇候分班引出聲警皇帝皇后起赴北
殿皇太后於御容殿與皇帝皇后率臣僚再拜皇太
后上香皆再拜贊各祇候可矮敝以上上殿皇太后

三進御容酒陪位皆拜皇太后升殿坐皇帝就露臺
上褥位親王押北南臣僚班丹墀內立皇帝再拜臣
僚皆拜鞠躬皇帝欄內跪祝皇太后壽訖復位再拜
凡拜皆稱萬歲贊各祇候臣僚不出皇帝皇后側坐
親王進酒臣僚陪拜皇太后宣答皆如正旦之儀臣
僚分班不出班首右階上殿奏表目合班謝宣宴上
殿就位如儀御牀入皇帝進皇太后酒如初各就座
行酒宣飲盡如皇太后生辰之儀皇后進酒如皇帝

之儀三進酒行茶教坊致語行穀膳大饌七進酒曲
破臣僚起御牀出謝宴皆如皇太后生辰儀

立春儀皇帝出就內殿拜先帝御容北南臣僚丹墀內
合班再拜可矮襖以上入殿賜坐帝進御容酒陪位
并侍立皆再拜一進酒臣僚下殿左右相向立皇帝
戴幘勝等第賜幘勝臣僚簪畢皇帝於土牛前上香
三奠酒不拜教坊動樂侍儀使跪進綵杖皇帝鞭土
牛可矮襖以上北南臣僚丹墀內合班跪左膝受綵

杖直起再拜贊各祇候司辰報春至鞭土牛三匝矮
襪鞭止引節度使以上上殿撒穀豆擊土牛撒穀豆
許象奪之臣僚依位坐酒兩行春盤入酒三行畢行
茶皆起禮畢

重午儀至日臣僚昧爽赴御帳皇帝繫長壽絲縷升車
坐引北南臣僚合班如升墀之儀所司各賜壽縷揖
臣僚跪受再拜引退從駕至膳所酒三行若賜宴臨
時聽敕

重九儀北南臣僚旦赴御帳從駕至圍場賜茶皇帝就坐引臣僚御前班立所司各賜菊花酒跪受再拜酒三行揖起

藏闔儀至日北南臣僚常服入朝皇帝御天祥殿臣僚依位賜坐契丹南面漢人北面分朋行闔或五或七籌賜膳八食畢皆起頃之復坐行闔如初晚賜茶三籌或五籌罷教坊承應若帝得闔臣僚進酒訖以次賜酒

太康十年十二月二十二日始行是儀是日不御朝

歲時雜儀正旦國俗以糯飯和白羊髓為餅丸之若拳每帳賜四十九枚戊夜各於帳內窻中擲丸於外數偶動樂飲宴數奇令巫十有二人鳴鈴執箭繞帳歌呼帳內爆鹽壚中燒地拍鼠謂之驚鬼居七日乃出國語謂正旦為阿尼雅伊能伊

立春婦人進春書刻青綵為幟像龍御之或為蟾蜍書

幟曰宜春

人日凡正月之日一雞二狗三豕四羊五馬六牛七日
為人其占晴為祥陰為災俗煎餅食於庭中謂之薰
天

二月一日為中和節國舅族蕭氏設宴以延國族耶律
氏歲以為常國語是日為札拉巴

二月八日為悉達太子生辰京府及諸州雕木為像儀
仗百戲導從循城為樂悉達太子者西域淨梵王子

姓瞿曇氏名釋迦牟尼以其覺性稱之曰佛

三月三日為上巳國俗刻木為兔分朋走馬射之先中者勝負朋下馬列跪進酒勝朋馬上飲之國語謂是日為陶拉噶爾布噶

五月重五日午時採艾葉和綿著衣七事以奉天子北南臣僚各賜三事君臣宴樂渤海膳夫進艾饌以五綵絲為索纏臂謂之合歡結又以綵絲宛轉為人形簪之謂之長命縷國語謂是日為托卜伊能伊

夏至之日俗謂之朝節婦人進綵扇以粉脂囊相贈遺
六月十有八日國俗耶律氏設宴以延國舅族蕭氏
亦謂之札拉巴

七月十三日夜天子於宮西三十里卓帳宿焉前期備
酒饌翼日諸軍部落從者皆動番樂飲宴至暮乃歸
行宮謂之迎節十五日中元動漢樂大宴十六日昧
爽復往西方隨行諸軍部落大譟三謂之送節國語
謂之賽音伊能伊

八月八日國俗屠白犬於寢帳前七步瘞之露其喙後
七日中秋移寢帳於其上國語謂之伊克努爾

九月重九日天子率羣臣部族射虎少者為負罰重九
宴射畢擇高地卓帳賜番漢臣僚飲菊花酒兔肝為
鵜鹿舌為醬又研茱萸酒洒門戶以禳穰國語謂是
日為博羅哩烏楚哩

歲十月五京進紙造小衣甲槍刀器械萬副十五日天
子與羣臣望祭木葉山用國字書狀并焚之國語謂

之達勒噶喀

冬至日國俗屠白羊白馬白鴈各取血和酒天子望拜
黑山黑山在境北俗謂國人魂魄其神司之猶中國
之岱宗云每歲是日五京進紙造人馬萬餘事祭山
而焚之俗甚嚴畏非祭不敢近山

臘辰日天子率北南臣僚並戎服戊夜坐朝作樂飲酒
等第賜甲仗羊馬國語謂是日為綽哈雅布

再生儀凡十有二歲皇帝本命前一年季冬之月擇吉

日前期禁門北除地置再生室母后室先帝神主與
在再生室東南倒植三歧木其日以童子及產醫嫗
置室中一婦人執酒一叟持矢箠立於室外有司請
神主降輿致奠奠訖皇帝出寢殿詣再生室羣臣奉
迎再拜皇帝八室釋服跣以童子從三過歧木之下
每過產醫嫗致詞拂拭帝躬童子過歧木七皇帝卧
木側叟擊箠曰生男矣太巫幪皇帝首興羣臣稱賀
再拜產醫嫗受酒于執酒婦以進太巫奉襁褓緣結

等物贊祝之預選七叟各立御名繫于綵皆跪進皇
帝選嘉名受之賜物再拜退羣臣皆進襁褓綵結等
物皇帝拜先帝諸御容遂宴羣臣

善哉蘇爾威汗之垂訓後詞也孺子無不慕其親
者嗜欲深而愛淺妻子具而孝哀人人皆然而況
天子乎再生之儀歲一周星使天子一行是禮以
起其孝心夫體之也真則其思之也切孺子之慕
將有油然發于中心者感發之妙非言語文字之

所能及善哉蘇爾威汗之垂訓後嗣也始之以三
過歧木母氏劬勞能無念乎終之以拜先帝御容
敬承宗廟宜何如哉詩曰無念爾祖聿修厥德

遼史卷五十三

遼史卷五十三考證

應聖節宋遣使來賀生辰正旦始制此儀 按太宗本
紀天顯十二年皇太后永寧節晉及諸國來賀會同
四年詔以永寧天授二節及正旦重午冬至臘並受
賀著為令是賀皇太后儀不始自興宗也至聖宗本
紀統和二十三年宋使來賀太后生辰則宋使來賀
之儀亦不應自應聖節始制

立春儀 按韓琦安陽集有使契丹謝春槃戴勝狀據

此則遼于立春日亦賜諸國使臣幡勝矣

藏闔儀 按遊幸表開泰八年十二月幸秦晉長公主

第作藏闔宴據此則志所云太康十年十二月二十

二日始行是儀者疑有誤然考道宗本紀太康十年

雖無作藏闔儀之文而聖宗本紀開泰八年亦不書

幸秦晉長公主第事表志互異他書均無可考謹附

識之

遼史卷五十三考證

欽定四庫全書

遼史卷五十四

元中書右丞相總裁托克托等修

志第二十三

樂志

遼有國樂有雅樂有大樂有散樂有鐃歌橫吹樂舊史稱聖宗興宗咸通音律聲氣歌辭舞節徵諸太常儀鳳教坊不可得按紀志遼朝雜禮參考史籍定其可知者

以補一代之闕文嗚呼咸韶夏武之樂聲亡書逸河間作記史遷因以為書寥乎希哉遼之樂觀此足矣

國樂

遼有國樂猶先王之風其諸國樂猶諸侯之風故志其畧

正月朔日朝賀用宮懸雅樂元會用大樂曲破後用散樂角觝終之是夜皇帝燕飲用國樂

七月十三日皇帝出行宮三十里卓帳十四日設宴應

從諸軍隨各部落動樂十五日中元大宴用漢樂

春飛放杏塢皇帝射獲頭鵝薦廟燕飲樂工數十人執

小樂器侑酒

諸國樂

太宗會同三年晉宣徽使楊端王朮等及諸國使朝見
皇帝御便殿賜宴端朮起進酒作歌舞上為舉觴極
歡

會同三年端午日百僚洎諸國使稱賀如式燕飲命回

鵬燉煌二使作本國舞

天祚天慶二年駕幸混同江頭魚酒筵半酣上命諸部
長次第歌舞為樂女直阿固達端立直視辭以不能
上謂蕭奉先曰阿固達意氣雄豪顧視不常可托以
邊事殺之不然恐貽後患奉先奏阿固達無大過殺
之傷向化之意最爾小國又何能為

雅樂

自漢以後相承雅樂有古頌焉有古大雅焉遼闕郊廟

禮無頌樂大同元年太宗自汴將還得晉太常樂譜宮
懸樂架委所司先赴中京

聖宗太平元年尊號冊禮設宮懸於殿庭舉麾位在殿
第三重西階之上協律郎各入就舉麾位太常博士
引太常卿太常卿引皇帝將仗動協律郎舉麾太樂
令令撞黃鍾之鍾左右鍾皆應工人舉祝樂作皇帝
即御坐扇合樂止

王公入門樂作至位樂止

通事舍人引押冊大臣初動樂作置冊殿前香案訖
就位樂止

舁冊官奉冊初動樂作升殿置冊御坐前就西墻北
上位樂止

大臣上殿樂作至殿欄內位樂止

大臣降殿階樂作復位樂止

王公三品以上出樂作太常博士引太常卿太常卿
引皇帝降御坐入閣樂止

興宗重熙九年上契丹冊皇帝出奏隆安之樂

聖宗統和元年冊承天皇帝太后設宮懸翼簾太樂工協律郎入

太后儀衛動舉麾太和樂作太樂令太常卿導引升御坐簾捲樂止

文武三品以上入舒和樂作至位樂止

皇帝入門雍和樂作至殿前位樂止

宰相押冊皇帝隨冊樂作至殿前置冊於案樂止

翰林學士大將軍舁冊樂作置御坐前樂止

丞相上殿樂作至讀冊位樂止

皇帝下殿樂作至位樂止

太后宣答訖樂作皇帝至西閣樂止

親王丞相上殿樂作退班出樂止

下簾樂作皇太后入內樂止

冊皇太子儀太子初入門貞安之樂作

冊禮樂工次第

四隅各置建鼓一虞樂工各一人

宮懸每面九虞每虞樂工一人

樂虞近北置祝敔各一樂工各一人

樂虞內坐部樂工左右各一百二人

樂虞西南武舞六十四人執小旗二人

樂虞東南文舞六十四人執小旗二人

協律郎二人

太樂令一人

唐十二和樂遼初用之

豫和祀天神

順和祭地祇

永和享宗廟

肅和登歌奠玉帛

雍和入俎接神

壽和酌獻飲神

太和節升降

舒和節出入

昭和舉酒

休和以飯

正和皇后受冊以行

承和太子以行

遼十二安樂初梁改唐十二和樂為九慶樂後唐建唐
宗廟仍用十二和樂晉改為十二同樂遼雜禮天子
出入奏隆安太子行奏貞安則是遼嘗改樂名矣餘

十安樂名缺

遼雅樂歌辭文闕不具八音器數大抵因唐之舊

八音

金 鑄鐘

石 球磬

絲 琴瑟

竹 簫簫筴

匏 笙竽

土 壘

革 鼓鼗

木 祝敔

十二律用周黍尺九寸管空徑三分為本道宗太康中
詔行秬黍所定升斗嘗定律矣其法大抵用古律焉

大樂

自漢以來因秦楚之聲置樂府至隋高祖詔求知音者
鄭譯得西域蘇祇婆七旦之聲求合七音八十四調之

說由是雅俗之樂皆此聲矣用之朝廷別於雅樂者謂之大樂晉高祖使馮道劉昫冊應天太后太宗皇帝其聲器工官與法駕同歸於遼

聖宗太平元年冊承天皇太后童子弟子隊樂引太后輦至金鑾門

天祚皇帝天慶元年上壽儀

皇帝出東閣鳴鞭樂作 簾捲扇開樂止

太尉執臺分班太樂令舉麾樂作 皇帝飲酒訖樂

止

應坐臣僚東西外殿太樂令引堂上樂升大臣執臺
太樂令奏舉觴登歌樂作飲訖樂止

行臣僚酒徧太樂令奏巡周舉麾樂作 飲訖樂止

太常卿進御食太官令奏食徧樂作 文舞入三變

引出樂止

次進酒行臣僚酒舉觴巡周樂作 飲訖樂止

次進食食徧樂作 武舞入三變引出樂止

扇合簾下鳴鞭樂作 皇帝入西閤樂止

大樂器本唐太宗七德九功之樂武后毀唐宗廟七德
九功樂舞遂亡自後宗廟用隋文武二舞朝廷用高宗
景雲樂代之元會第一奏景雲樂舞杜佑通典已稱諸
樂竝亡唯景雲樂舞僅存唐末五代板蕩之餘在者希
矣遼國大樂晉代所傳雜禮雖見坐部樂工左右各一
百二人蓋亦以景雲遺工充坐部其坐立部樂自唐已
亡可考者唯景雲四部樂舞而已

玉磬

方響

擲箏

筑

卧箜篌

大箜篌

小箜篌

大琵琶

小琵琶

大五絃

小五絃

吹葉

大笙

小笙

簫簞

簫

銅鈸

長笛

尺八笛

短笛

以上皆一人

毛員鼓

連鼓

具

以上皆二人餘每器工一人

歌二人

舞二十人分四部

景雲舞八人

慶雲樂舞四人

破陣樂舞四人

承天樂舞四人

大樂調雅樂有七音大樂亦有七聲謂之七旦一曰婆

陟力平聲二曰雞識長聲三曰沙識質直聲四曰沙侯
加濫聲五曰沙臘皆應聲六曰般贍五聲七曰侯利篋
斛先聲自隋以來樂府取其聲四旦二十八調為大樂
婆陟力旦

正宮

高宮

中呂宮

道調宮

南呂宮

仙呂宮

黃鍾宮

雞識旦

越調

大食調

高大食調

雙調

小食調

歇指調

林鍾商調

沙識旦

大食角

高大食角

雙角

小食角

歇指角

林鍾角

越角

沙侯加溫旦

中呂調

正平調

高平調

仙呂調

黃鍾調

般涉調

高般涉調

右四旦二十八調不用黍律以琵琶絃叶之皆從濁至清迭更其聲下益濁上益清七七四十九調餘二十一調失其傳蓋出九部樂之龜茲部云

大樂聲各調之中度曲協音其聲凡十曰五凡工尺上一四六勾合近十二雅律於律呂各闕其一猶雅音之

不及商也

散樂

殷人作靡靡之樂其聲往而不反流為鄭衛之聲秦漢之間秦楚聲作鄭衛寢亡漢武帝以李延年典樂府稍用西涼之聲今之散樂俳優歌舞雜進往往漢樂府之遺聲晉天福三年遣劉昫以伶官來歸遼有散樂蓋由此矣

遼冊皇后儀

呈百戲角觝戲馬以為樂

皇帝生辰樂次

酒一行 觴筵起歌

酒二行 歌手伎入

酒三行 琵琶獨彈

餅茶致語

食入雜劇進

酒四行

闕

酒五行 笙獨吹鼓笛進

酒六行 箏獨彈築毬

酒七行 歌曲破角觥

曲宴宋國使樂次

酒一行 膏簾起歌

酒二行 歌

酒三行 歌手伎入

酒四行 琵琶獨彈

餅茶致語

食入雜劇進

酒五行

闕

酒六行 笙獨吹合法曲

酒七行 箏獨彈

酒八行 歌擊架樂

酒九行 歌角觝

散樂以三音該三才之義四聲調四時之氣應十二管之數截竹為四竅之笛以叶音聲而被之絃歌三音天音揚地音抑人音中皆有聲無文四時春聲曰平夏聲曰上秋聲曰去冬聲曰入

散樂器箏簫簫笛笙琵琶五絃箜篌箏方響杖鼓第二鼓第三鼓腰鼓大鼓鞞拍板

雜戲目齊景公用倡優侏儒至漢武帝設魚龍曼延之

戲後漢有繩舞自刻之伎杜佑以為多幻術皆出西域
哇俚不經故不具述

鼓吹樂

鼓吹樂一曰短簫鐃歌樂自漢有之謂之軍樂遼雜禮
朝會設熊罴十二案法駕有前後部鼓吹百官鹵簿皆
有鼓吹樂

前部

鼓吹令二人

柶鼓十二

金鉦十二

大鼓百二十

長鳴百二十

鐃十二

鼓十二

歌二十四

管二十四

簫二十四

笛二十四

後部

大角百二十

鼓吹丞二人

羽葆十二

鼓十二

管二十四

笛二十四

鏡十二

鼓十二

簫二十四

筚二十四

右前後鼓吹行則導駕奏之朝會則列仗設而不奏

橫吹樂

橫吹亦軍樂與鼓吹分部而同焉皆屬鼓吹令

前部

大橫吹百二十

節鼓二

笛二十四

簫篳篥二十四

茄二十四

桃皮簫篳篥二十四

柁鼓十二

金鉦十二

小鼓百二十

中鳴百二十

羽葆十二

鼓十二

管二十四

簫二十四

箛二十四

後部

小橫吹百二十四

笛二十四

簫二十四

觱篥二十四

桃皮觱篥二十四

百官鼓吹橫吹樂自四品以上名有增損見儀衛志自周衰先王之樂寢以亾缺周南變為秦風始皇有天下

鄭衛秦燕趙楚之聲迭進而雅聲亡矣漢唐之盛文事
多西音是為大樂散樂武事皆北音是為鼓吹橫吹樂
雅樂在者其器雅其音亦西云

遼史卷五十四

遼史卷五十四考證

舉麾位在殿三重西階之上 三重禮志作二重

聖宗太平元年冊承天皇后 按聖宗統和登極冊
皇太后越三十有九年為太平元年蓋又為改元而
冊也本紀遺是年冊太后事

遼史卷五十四考證